



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ
ԳԼԽԱՎՈՐ ՔԱՐՏՈՒՂԱՐ

Հայաստանի Հանրապետություն, 0010, ք. Երևան, Տիգրան Մեծի 4, հեռ.՝ (+374 60) 830 – 840, (+374 60) 830 850
Էլ-փոստ՝ info@competition.am, վեբ կայք՝ <http://www.competition.am>

ք. Երևան

11 դեկտեմբերի 2023թ.

ՈՐՈՇՈՒՄ
ՄՊՀ-ԳՔ-2023/1

**«Ջանիկ Սևոյան» Ա/Ձ-ին գնումների գործընթացին մասնակցելու իրավունք չունեցող
մասնակիցների ցուցակում ներառելու վերաբերյալ**

Գնման ընթացակարգի ծածկագիր՝ «ՄՊՀ-ԳՀԾՁԲ-23/31»

Մասնակից՝ «Ջանիկ Սևոյան» Ա/Ձ

(ՀՎՀՀ՝ 37488172, հասցե՝ ՀՀ, գ. Շահումյան, Գայի 8)

Մրցակցության պաշտպանության հանձնաժողովի (այսուհետ նաև՝ **Հանձնաժողով** կամ **Պատվիրատու**) և «Ջանիկ Սևոյան» Ա/Ձ-ի (այսուհետ նաև՝ **Կատարող**) միջև 2023 թվականի հուլիսի 11-ին ծրագրային ապահովման սպասարկման ծառայությունների (այսուհետ նաև՝ **Ծառայություն**) մատուցման նպատակով կնքվել էր թիվ «ՄՊՀ-ԳՀԾՁԲ-23/31» պայմանագիրը (այսուհետ նաև՝ **Պայմանագիր**):

Պայմանագրով Կատարողը պարտավորություն էր ստանձնել իրականացնել Հանձնաժողովի e-Compete էլեկտրոնային համակարգի (այսուհետ նաև՝ **Համակարգ**) սպասարկումը:

Պայմանագրի 2-րդ մասի 1-ին կետի 3-րդ ենթակետի համաձայն՝ Պատվիրատուն իրավունք ունի միակողմանի լուծել պայմանագիրը, եթե Կատարողն էականորեն խախտել է պայմանագիրը: Կատարողի կողմից պայմանագիրը խախտելն էական է համարվում, եթե՝

ա) մատուցված ծառայությունը չի համապատասխանում պայմանագրի N 1 հավելվածով սահմանված պահանջներին,

բ) խախտվել է ծառայության մատուցման ժամկետը:

Պայմանագրի անբաժանելի մաս հանդիսացող Հավելված 1-ով սահմանված «Տեխնիկական բնութագիր – Գնման ժամանակացույց»-ի համաձայն՝ Կատարողը պետք է ապահովի «Անձնական տվյալների պաշտպանության մասին» օրենքով սահմանված անձնական տվյալների պաշտպանությունը և գաղտնիությունը, պահպանի Ծառայությունների մատուցման ընթացքում իրեն հայտնի դարձած տեղեկությունները, այդ թվում՝ Պատվիրատուի ծառայողական, բանկային կամ այլ գաղտնիք պարունակող տեղեկությունները, չհրապարակի կամ այլ կերպ երրորդ անձանց համար հնարավորություն չստեղծի ծանոթանալու դրանց:

Մինչույն ժամանակ, Պատվիրատուի և Կատարողի միջև 2023 թվականի հուլիսի 11-ին կնքվել է նաև Գաղտնիության համաձայնագիր (այսուհետ նաև՝ **Համաձայնագիր**), որի 2.1 կետի համաձայն՝ Կատարողը պարտավորվել է չհրապարակել Պատվիրատուի կողմից տրամադրված և Համաձայնագրի 1.1 կետով սահմանված օրենքով պահպանվող գաղտնիք հանդիսացող տեղեկատվությունը և այն օգտագործել բացառապես Պայմանագրով սահմանված նպատակի համար, այն է՝ իրականացնել Հանձնաժողովի էլեկտրոնային համակարգի սպասարկումը:

Համաձայնագրի 2.1.3 կետի համաձայն՝ Կատարողը պարտավորվում է օրենքով պահպանվող գաղտնիք հանդիսացող տեղեկությունը տրամադրել միայն այն աշխատակիցներին, ում աշխատանքային գործառույթներն ընդգրկում են տրամադրվող տեղեկության օգտագործումը: Կատարողը պարտավորվում է ապահովել աշխատակիցների կողմից վերոնշյալ տեղեկության գաղտնիության պահպանումը:

Համաձայնագրով սահմանված են գաղտնիք պարունակող տեղեկատվության և գաղտնիք պարունակող տեղեկատվության հրապարակման հասկացությունները, որոնք են.

1.1. Գաղտնիք պարունակող տեղեկատվություն՝

1.1.1. բանկային, հարկային, առևտրային (այդ թվում՝ Կատարողին տրամադրված ծրագրային փաստաթղթերը, հասկացությունները, գրառումները, նախագծերը, ալգորիթմները և այլ փաստաթղթերը) կամ ծառայողական գաղտնիք հանդիսացող տեղեկություն,

1.1.2. անձնական տվյալներ պարունակող տեղեկատվություն, կամ

1.1.3. օրենքով պահպանվող այլ գաղտնիք հանդիսացող տեղեկություն:

1.2 Բացառություն է կազմում այն տեղեկատվությունը, որը

ա. համընդհանուր հայտնի է կամ հասանելի հանրությանը կամ դառնում է այդպիսին առանց խախտելու սույն Համաձայնագիրը,

բ. հայտնի է Կատարողին մինչև Պայմանագրի կատարման նպատակով տվյալ տեղեկատվությունը պարունակող բազաներին հասանելիություն ստանալը,

գ. ձեռք է բերվել Կատարողի կողմից այլ աղբյուրներից:

1.3 Օրենքով պահպանվող գաղտնիք հանդիսացող տեղեկատվության հրապարակում՝ գաղտնիք պարունակող տեղեկատվության օգտագործում ոչ ծառայողական նպատակներով, տարածում, բացահայտում, փոխանցում, հաղորդում,

տրամադրում, առաքում, ինչպես նաև որևէ ձևով մատչելի դարձնելը երրորդ անձանց կամ այն անձանց, ովքեր այդպիսի տեղեկություններին առնչվելու թույլտվություն չունեն: Վերոգրյալից հետևում է Կատարողի, այդ թվում՝ աշխատակիցներին ներգրավելու և տեղեկատվությունը վերջիններիս հասանելի դարձնելու դեպքում, գաղտնիք պարունակող տեղեկատվության պահպանման պարտականությունը: Ընդ որում, գաղտնիք պարունակող տեղեկատվության հրապարակումը ներառում է նաև այն ցանկացած եղանակով երրորդ անձանց հասանելի դարձնելը:

Մինչդեռ Կատարողի կողմից թույլ է տրվել Պայմանագրի էական խախտումներ, մասնավորապես.

1. Պատվիրատուն Ծառայության մատուցման շրջանակում առաջացող խնդիրների հաշվառմամբ Կատարողի ռեսուրսների և հնարավորությունների գնահատման նպատակով հարցում է հղել Կատարողին՝ ծառայությունների մատուցման հնարավորությունների վերաբերյալ՝ պահանջելով ներկայացնել Կատարողի աշխատակիցների անուն, ազգանունները՝ մանրամասն նկարագրելով յուրաքանչյուրի կողմից իրականացվող աշխատանքներն ու գործառույթների բաշխվածությունը: Կատարողը հայտնել է, որ աշխատանքների կատարման համար ներգրավված է համակարգող, ծրագրային մասնագետ (այդ թվում նաև գիշերային հերթափոխով), տվյալների բազայի մասնագետ: Կատարողը հրաժարվել է ներկայացնել աշխատակցիների վերաբերյալ համապատասխան տեղեկատվությունը:

Նման պայմաններում Հանձնաժողովը 2023 թվականի նոյեմբերի 11-ի թիվ ԳԳ/964-2023 գրությամբ դիմել է Պետական եկամուտների կոմիտեին (այսուհետ նաև՝ **Կոմիտե**) Կատարողի աշխատակիցների վերաբերյալ տեղեկատվության ստացման նպատակով: Մինչդեռ Կոմիտեն 2023 թվականի նոյեմբերի 23-ի թիվ 7414 գրությամբ հայտնել է, որ Կատարողը գրանցված աշխատակիցներ չունի:

Վերոգրյալի հաշվառմամբ ակնհայտ է, որ Կատարողի կողմից խախտվել է Պատվիրատուի կողմից տրամադրված և Համաձայնագրի 1.1 կետով սահմանված օրենքով պահպանվող գաղտնիք հանդիսացող տեղեկատվության պահպանման պարտավորությունը:

2. Կատարողի կողմից Ծառայության մատուցումը, ի թիվս այլնի, ներառում է տեխնիկական աջակցություն և SS խորհրդատվություն, Համակարգում ի հայտ եկած սխալների վերացում և շտկում, խնդիրների լուծում, Համակարգի կատարելագործմանն ուղղված աշխատանքներ, թերությունների և միջադեպերի կարգավորում 24 ժամվա ընթացքում, ինչպես նաև փոփոխությունների (այդ թվում՝ ընթացակարգերում օրենսդրական փոփոխությունների) թվայնացման և ավտոմատացման համար անհրաժեշտ ծրագրային թարմացումների իրականացում:

Վերոգրյալի հաշվառմամբ Կատարողին են տրվել համապատասխան առաջադրանքներ, որոնք վերջինիս կողմից նշվել են որպես կատարված: Մինչդեռ բազմաթիվ առաջադրանքներ (**ցանկը Պայմանագրի միակողմանի լուծման ծանուցման հետ 2023 թվականի դեկտեմբերի 1-ին, ինչպես նաև 2023 թվականի**

դեկտեմբերի 4-ին ուղարկվել է Կատարողի էլեկտրոնային փոստի հասցեին)
փաստացի չեն կատարվել կամ կատարվել են էական թերություններով՝ միաժամանակ
Համակարգում առաջացնելով Հանձնաժողովի բնականոն գործունեությունը խաթարող
լրջագույն այլ միջադեպեր և խնդիրներ:

Այսինքն՝ Կատարողը թույլ է տվել Պայմանագրի էական խախտումներ՝ մատուցել է
Պայմանագրի N 1 հավելվածով սահմանված պահանջներին անհամապատասխան
Ծառայություն, ինչպես նաև խախտել է Պայմանագրով և Համաձայնագրով սահմանված
գաղտնիք պարունակող տեղեկատվության պահպանման պահանջները, որի
հաշվառմամբ՝ Պատվիրատուն 2023 թվականի դեկտեմբերի 1-ին միակողմանի լուծել է
Պայմանագիրը, որի մասին ծանուցումը նույն օրը հրապարակվել է տեղեկագրում,
ինչպես նաև Պայմանագրի 7-րդ մասի 9-րդ կետի համաձայն ուղարկվել է Կատարողի
էլեկտրոնային փոստի հասցեին:

«Գնումների մասին» օրենքի 6-րդ հոդվածի 1-ին մասի 6-րդ կետի համաձայն՝
գնումների ընթացակարգերին մասնակցելու իրավունք չունեն այն անձինք՝ որոնք հայտը
ներկայացնելու օրվա դրությամբ ներառված են գնումների գործընթացին մասնակցելու
իրավունք չունեցող մասնակիցների ցուցակում: Մասնակիցն ընդգրկվում է նշված
ցուցակում, եթե՝

ա. խախտել է պայմանագրով նախատեսված կամ գնման գործընթացի
շրջանակում ստանձնած պարտավորությունը, որը հանգեցրել է պատվիրատուի կողմից
պայմանագրի միակողմանի լուծմանը կամ գնման գործընթացին տվյալ մասնակցի
հետագա մասնակցության դադարեցմանը և մասնակիցը հրավերով և (կամ)
պայմանագրով սահմանված ժամկետում չի վճարել հայտի, պայմանագրի և (կամ)
որակավորման ապահովման գումարը,

բ. որպես ընտրված մասնակից հրաժարվել կամ զրկվել է պայմանագիր կնքելու
իրավունքից:

«Գնումների մասին» օրենքի 6-րդ հոդվածի 2-րդ մասի համաձայն՝ լիազորված
մարմինը մասնակցին ներառում է գնումների գործընթացին մասնակցելու իրավունք
չունեցող մասնակիցների ցուցակում պատվիրատուի ղեկավարի պատճառաբանված
որոշման հիման վրա: Սույն մասում նշված որոշումը պատվիրատուի ղեկավարը
կայացնում է գնման ընթացակարգը չկայացած հայտարարվելու կամ կնքված
պայմանագրի վերաբերյալ հայտարարությունը հրապարակելու կամ պայմանագիրը
միակողմանի լուծելու մասին հայտարարությունը հրապարակելու օրվան հաջորդող
տասն օրվա ընթացքում: Որոշումը կայացվելուն հաջորդող օրը այն տրամադրվում է
լիազորված մարմնին և մասնակցին:

Միևնույն ժամանակ, Կատարողը ծանուցվել է, որ

• «Գնումների մասին» օրենքի 6-րդ հոդվածի 2-րդ մասի նախատեսված՝
լիազորված մարմնին որոշումը ներկայացվելու վերջնաժամկետը լրանալու օրվա
դրությամբ մասնակցի կամ պայմանագիրը կնքած անձի կողմից պայմանագրի և (կամ)
որակավորման ապահովման գումարը վճարված լինելու դեպքում պատվիրատուն տվյալ

մասնակցին ցուցակում ներառելու պատճառաբանված որոշումը չի ներկայացնում լիազորված մարմին.

- մասնակցի կամ պայմանագիրը կնքած անձի կողմից պայմանագրի և (կամ) որակավորման ապահովման գումարի վճարումն լիազորված մարմնին որոշումը ներկայացվելու վերջնաժամկետը լրանալուց հետո, բայց ոչ ուշ, քան մասնակցին կամ պայմանագիր կնքած անձին ցուցակում ներառելու վերջնաժամկետը լրանալու օրը իրականացված լինելու դեպքում, պատվիրատուն դրա մասին գրավոր տեղեկացնում է լիազորված մարմին, որի հիման վրա մասնակիցը չի ներառվում ցուցակում:

Մինչդեռ, սույն որոշման ընդունման պահի դրությամբ Կատարողի կողմից համապատասխան գումարների վճարված լինելու վերաբերյալ տվյալներ առկա չեն:

Ողջ վերոգրյալի հաշվառմամբ և ղեկավարվելով «Գնումների մասին» օրենքի 6-րդ հոդվածի 2-րդ մասով՝

ՈՐՈՇԵՑԻ

«Ջանիկ Սևոյան» Ա/Ձ-ին ներառել գնումների գործընթացին մասնակցելու իրավունք չունեցող մասնակիցների ցուցակում:

ԳԼԽԱՎՈՐ ՔԱՐՏՈՒՂԱՐ



ԱՇԽՏ ՎԱՀԱՆՅԱՆ